

聖諭像解

聖諭像解卷之六目錄

聖諭第二條

篤宗族以照雍穆

大封同姓

擇師教導

義田贍族

孚及畜犬

感及業馬

兒無常父

重一忍字

賑恤中表

戰禍頗邊

經紀遺產

惠施存歿

還產動天

聖諭像解卷之六

江南太平府繁昌縣知縣加一級臣梁延年編輯

聖諭第二條

篤宗族以昭雍穆

此一條是

皇上欲汝等百姓輯睦宗族以敦親親之義也。唐荆川曰。古者因族而立之宗。族人_有餘財。則歸之宗。不給。則資之宗。其族人如腰臂手足之相與爲一體。其財

賄如津液之經緯榮灌於其間而無有羸乏之處。蘓洵曰。今吾族人猶有百餘人。而歲時蜡社不能相與盡其歡欣愛洽。稍遠者至不相往來。是無以示吾鄉黨隣里也。乃作蘇氏族譜立亭於高祖墓塋之西南而刻石焉。旣而告之曰。凡在此者。歿必赴冠娶妻必告。少而孤則老者字之。貧而無歸則富者収之。而不然者。族人之所共誚讓也。堯典載克明峻德以親九族。蔡註謂九族高祖至元孫之親。舉近以該遠。五服異姓之親亦在其中也。晏子曰。自臣之貴。父之族無不乘車者。母之族無不足於衣食者。妻之族無凍餒。

者。齊國之士待臣而舉火者三百餘人。由此觀之。孰謂宗族而可以異視乎。

皇上特舉此條。蓋欲汝等推恩廣愛。合渙萃離。庶不致一本之親。等於行路。母黨妻族。漠若無關。斯仁讓之風所由隆也。洪範曰。是彝是訓。于帝其訓。蓋言君之訓。卽天之訓也。咨爾小民。尚其敬聽之哉。

大封同姓



武王十有三年。王來自商。諸侯受命。大封建諸侯于天下。封兄弟之國十五人。姬姓之國四十人。子孫不狂惑者。皆爲諸侯。

此一幅像。是寫武王旣得天下。封建同姓。以爲藩屏也。武王應天順人。功旣告成。天下諸侯。罔不受命。武王於是布德行政。與之更始。乃封兄弟之國十五人。同姓之國四十人。或以親。或以賢。或以功。或以才。各次第受封。其子孫性非狂亂愚惑者。亦量封爲諸侯。卒之歷世三十。歷年八百。雖曰法制之盡善。亦由惇叙之澤長也。

擇師教導



漢文帝。竇后兄長君弟廣國。字少君。聞后立。上書自陳。后言帝召見問之。具言其故。於是竇后持之而泣。厚賜之。俾家於長安。絳侯灌將軍等曰。此兩人微。不可不爲擇師傅。於是乃選長者之有節行者。與俱。長君少君由此爲退讓君子。不敢以富貴驕人。後景帝立。皇后爲皇太后。乃封廣國爲章武侯。長君先歿。封其子彭祖爲南皮侯。

此一幅像。是寫文帝恩加后族。景帝恩加母族。其仁愛之心無已也。竇后之兄長君。與弟廣國。字少君。聞竇后旣立爲后。乃上書自陳。所以。后言於帝。乃召見。

問之。遂悉其故。竇后始持之涕泣。因厚賜之。使家於長安。絳侯勃灌將軍嬰曰。此兩人所出甚微。不可不爲擇賢師傳教之。於是乃選老成有高節美行者。與之同處。兩人習與性成。皆爲退讓君子。不敢以富貴驕傲於人。後景帝立。尊竇皇后爲皇太后。乃封廣國爲章武侯。長君不幸先歿。封其子彭祖爲南皮侯。夫欲戚畹永保福祿。則必擇正人以訓導之。使動循軌則。卑牧鳴謙。孝經所云高而不危。所以長守貴也。滿而不溢。所以長守富也。殆謂是歟。兩君必景帝卽位乃始封侯。后族與母族異也。恩施有節。真盛世之令

典哉。

義田贍族



范文正公。蘇人也。平生好施與。擇其親而貧。踈而賢者。咸施之。方貴顯時。置負郭常稔之田千畝。號曰義田。以養濟群族之人。日有食。歲有衣。嫁娶喪葬皆有贍。擇族之長而賢者主其計。而時其出納焉。日食人一升。歲衣人一縑。嫁女者五十千。再嫁者三十千。娶婦者三十千。再娶者十五千。葬者如再嫁之數。葬幼者十千。族之聚者九十口。歲入給稻八百斛。以其所入給其所聚。沛然有餘而無窮。仕而家居。俟代者與焉。仕而居官者。罷莫給。此其大較也。初公之未貴顯也。嘗有志於是矣。而力未逮者三十年。既而爲西帥。及參大政。於是始有祿賜。

之入而終其志。公既歿。後世子孫修其業。承其志。如公之存也。

此一幅像。是寫范文正公義田千畝賑族之法盡善也。公蘇州人。生平最好施與濟衆。擇親而貧窮。踈而賢良者。咸施之。無所吝。當貴顯之時。置買背負城郭。歲常豐收之田。其計千畝。名爲義田。以養濟同族之人。日則給食。歲則給衣。凡嫁娶喪葬。皆有贈以贍益之。選擇族中之年長而賢德者。使主會計之事。而依時以出納焉。每日食人米一升。每歲衣人縑一匹。嫁女者給錢五十千。再嫁者給錢三十千。娶婦者給錢

三十千。再娶者給錢十五千。葬者給錢如再嫁之數。葬幼者給錢十千。凡族之群聚待給者。其九十口。歲入所給之稻。約計八百斛。以千畝田之所入。給九十口之所聚。如源泉始達。沛然有餘而無窮。其出仕而家居候補者。照數與之。其出仕而現居官者。既有祿俸之人。則罷而勿給。此其大畧也。初公微時。嘗有此志。特力不足者三十年。及帥西夏。參大政。祿賜既豐。此志始酬。公既歿。子孫依公舉行。與公生存相似。迄今英賢繼武。簪纓蟬聯。蓋深仁厚德。靡有涯涘。故食報亦靡有涯涘也。公嘗語諸子弟曰。吾吳中宗族甚